

Pa loke ta calypso y roadmarch di Aruba

Mighty Talent y tur e otronan a duné su propio indentidad



Mighty Talent den compania di Milo Croes y Minister Eddie Briesen.

ORANJESTAD-Calypso y roadmarch festival a conocé un revolucion total desde 1984. Un cambio masha importante mes cu a nificá un era nobo pa e mundo di música local y pa carnaval tambe.

Young Quick Silver sigur tabata esun cu a habri porta pa e era nobo aki na 1967 y despues a calypso di Aruba a bin conocé un cambio radical cu e estilo di Lord Boxoe.

E fayecido cantante aki tabata a logra imponé pa promé vez den historia di calypso y roadmarch, un cancion ganador na papiamiento, loke sin duda tabata e inicio pa e cambionan grandi cu a bin despues.

Sinembargo e figura mas importante den duna nos calypso y roadmarch un estilo propio, tabata un hoben cantante cu na 1983 a logra su promé corona di calypso, esta Mighty Talent.

Desde 1983, Mighty Talent solamente a keda sin bira Calypso King na 1986 y 1994 y el a transformá su mes den e Voz di Pueblo.

Talent tabata un inspiracion pa e pueblo carnavalesco pero tambe pa otro cantantenan cu a sigui e

mesun caminda cu e gran cantante aki.

E resultado di e desarroyo aki ta fenomenal, caminda Aruba a haña su propio calypso, totalmente diferente cu e otro islanan den Caribe y esaki sigur ta di aplaudí.

COMPETENCIA SANO

A sigui añanan di competencia masha sano mes caminda e público y e carnaval di Aruba a bira e gran ganador.

Cantantenan manera Long Roy, Tattoo, Challenger, Lod Cachete, Lord Kinchi, Lady K, Mighty Hippie y sigur Mighty Rusty, a duna e festival di calypso y roadmarch un nivel sin igual cu ta difícil pa encontrá un festival igual.

Composicionnan extraordinario cu aña tras di aña ta birando mas mihor y cu sigur merecé mucho mas reconocimiento.

Ultimo añanan nos músiconan a produci obranan cu na cualkier otro país grandi, lo converti den éxitonan di fama mundial.

Ta simplemente fantástico mira e aceptacion cu artistanan manera Talent, Rusty, Tattoo, Hippie y tur e otronan ta logra durante di nan presentacion den e temporada di carnaval.

Rusty por ehempel aperi di su mala suerte tur aña di ta promé riba lista, a impactá cu su cancionnan, cualnan a haña tur reconocimiento e aña siguiente.

Talent kende pa promé vez desde 1986 no ta gana ningun premio den e competencia aki. Tattoo kende a introduci un estilo nobo di

roadmarch cu sin duda ta e amenaza di mas grandi na e dominic di Talent.

Challenger kende tambe tin su estilo único y kende tambe tur aña ta den un lucha formal di palabra cu Talent.

Y Cachete kende ta un

sensacion riba su mes, y cu ta deleitá e público na unda cu e actua.

Aruba ta conta cu tremendo músiconan carnaval sigur a yuda den e desarroyo grandi aki. □